

贛州府志卷三十四

人物志 隱逸 戎畧 寓賢 方伎

隱逸

易言潛言勿用為有潛德而隱於下位言也彼其德足以長人才足以用世而遯世無悶跡雖隱而行益顯豈徒沉匿泉石韜晦遺世已哉贛舊志載隱逸士叙錄稱詳慎皆志在高尚者也今更加搜攷續而補之以著於後立隱逸傳

晉 朱 鎮 陳方期 龔 亳

唐 賴 棐

宋 王 鴻 陳 炳 鍾 棐 陽孝本 李 存

贛州府志 卷三十四 隱逸

一

李 珙 孫 勳 謝陟明 王 瑜 劉應李 廖融

元 劉君賢 劉貴一 張立中 孫興禮

明 鍾士珍 宋 策 張 省 呂 正 胡廷聘

俞 通 方 澄 孫 榮 鄧宗堯 鍾朗鳴

李五行 許騰蛟

國朝鍾谷蘭 謝不敏 李 陶 呂岳瑚

晉

朱鎮字世安贛縣人行履高潔風韻適上晉太康中郡群為主簿不就棲遲環堵灌園種竹終其身

陳方期字長年雩都人以孝行稱晉太康初太守徐中景辟功曹不就執親喪晝夜號泣一日假寐若有人語曰

無益存亡願擇出處方期遂終身不仕以上俱通志
龔亳不知何代人隱於贛名其山曰龔公在贛興之交今
寶華寺其遺址也

唐

賴棐字忱父雩都人七歲能文博通經史唐乾元三年舉
進士授文館校書郎不就退居田里大歷初李景暘爲
邑令謂耆舊曰龐統里號冠蓋鄭元里稱通德棐方古
人夫復何愧即其所居號秘書坊

宋

王鴻字翼道雩都人自號晉右軍二十四世孫工篆隸八
分書宋皇祐間以鄉舉由太學再薦省試第一因失韻

贛州府志

卷三十四 隱逸

二

被黜柄文者爲之大息鴻歸卜築邑南泉石勝處居焉
名其山曰崑山巖曰需巖從學者甚衆嘗集野菜四十
九鹽一作羹餉客號大衍羹自詫勝五侯鯖周子倅郡
時以詩通問郡守劉彝聘掌郡校不就侍郎張頡薦於
朝不報肥遯四十餘年

陳炳字晦之贛縣人結廬崆峒山中躬耕樂道不求聞達
有文權十卷白雲編二十卷包拯知端州時過虔師事
之既歿銘其墓曰文高表正學希入聖靜退不競深中
篤行

鍾棐字子翼贛縣人博學篤行爲歐陽修尹洙余靖及曾
鞏所知蘇洵至虔棐與弟概從之遊洵不飲酒每爲設

禮儂智高叛嶺南聲搖江右郡守曹觀欲藉民財爲□
守備謀於棐棐曰智高必不能過嶺無事藉民民懼且
散矣觀曰如緩急何棐曰同舟遇風胡越可使爲左右
手况吾民乎不幸而有急則官與民爲一家夫孰非吾
財者何籍爲觀悟而止蘇軾還自海南訪棐已歿其二
子相持而泣作哀詞誄之

陽孝本字行先贛縣人一日上猶人徙居贛博學高行宋
熙寧中游上庠休澣未嘗出外與左丞汝陽蒲宗孟交
蒲盡市國學書與之攜歸隱於通天巖郡守林顏題曰
玉岩孝本平生不娶蘇軾過訪直造其室呼曰元德秀
孝本曰余乃陽城之裔也不娶直欲肖祖耳故軾詩有

贛州府志

卷三十四 隱逸

三

人謂元德秀自稱陽道州之句又贊其像人以爲實錄
崇寧中舉八行解褐國子錄再轉博士乞致仕朝廷寵
以奉議郎直秘閣賜緋魚袋領宮祠以歸晚年妾生二
子每拊其首曰吾無以遺汝惟有書數千卷卒年八十
四

李存贛縣人渾之子元豐己未進士不樂仕進與陽孝本
同隱於通天巖讀書觴咏人號崆峒二老

李珙字元瑞贛縣人博學有名孫立節以女妻之崇寧中
計偕入京師阻疾而還朝廷徵辟不應賜號養素處士
孫勳字世舉贛縣人立節季子涉獵經史尤工於詩年未
弱冠隨兄勰從蘇軾游氣節凜然臺府累舉不仕卜居

延春谷環堵蕭然瓶無儲粟裕如也軾榜其廬曰竹林隱士

謝陟明字彥升贛縣人學有志操家貧遭母喪未葬隣偶失火勢且延燒陟明抱柩痛哭欲與俱焚隣人赴救得全州郡辟舉皆不就登宣和三年進士以中原多故隱居貢水東終老不仕

以上張志俱

王瑜號北邱贛縣人穎異濶達絕意仕進喪祭一準於禮嘗曰聖人不能違時盡忠國家雖言不用吾亦可以無憾卒年八十二廬陵周必大銘其墓曰草野逸民心在王室殆非尋常山林中人

贛縣志

劉應李字希泌贛縣人炳之孫初名榮咸淳進士授建陽

贛州府志

卷三十四 隱逸

四

主簿入元不仕退與熊禾胡廷芳講道洪源山居十有餘年後建化龍書院於莒潭聚徒講授學者雲集

新志稿

廖融字元素虔化人卜隱南嶽與逸人任鵠凌蟾王正己王元共結詩社自號衡山居士湘守楊徽之司諫張觀嘗訪融山齋留詩贈別諷其出竟不仕而卒刺史何承矩葬之進士鄭鉉誌墓

元

劉君賢雩都人隱居城西授徒著書判官王榮忠高其行上書薦之不赴著有昌雩集

劉貴一字均佑信豐人生元明間詩文清絕築別墅吟咏其中不應州里之辟

□立中信豐人生有異質元亂隱山中明興恤遺老舉隱
逸俱不赴張以上俱志

孫興禮字慶甫篤學力行以孝友稱志存高上元至正間
御史程文海薦之以疾辭不就

明

鍾士珍以字行興國人子彥曾孫子彥博學不求聞達卜
築別業自號方塘清隱邑令唐子儀記之珍性孝友亦
決意高尚以方塘繼隱爲號不營世利翛然自得興國志

宋策贛縣人質直敦行誼教授鄉閭自號梅溪隱者宣德
癸丑膺懷材把德薦不就嘗作雪窻四友吟以自適子
必明有父風

贛州府志

卷三十四 隱逸

五

張省字悟充信豐人性樸雅嗜古讀書築松塘別墅以自

樂信豐志

呂正字廷福贛縣人幼博學工文詞成化間由鄉貢受睢
寧丞甫五月以不能覈趨俯仰拂衣歸卜築龍潭山麓
茅屋數椽日吟哦其間嘗曰予無所用於世援陶潛去
彭澤例歌歸去來而返躬耕之暇他無願慕惟眺水尋
山傍花隨柳點景詩壇藏闔酒社耳所著有龍溪清嘯
詩餘耕餘錄稿贛縣志

胡廷聘興國人性樸茂有懷葛之風泰和尹直讚之云匿
耀還淳屏浮黜僞真高士也

俞通字用中信豐人少有志操選寧府儀賓不就脫去俗

尚屏絕家累隱居七鯉築耕雲釣月軒吟咏其中詩詞
清逸號養氣翁

方澄龍南人後改入定南幼穎異儒業已成見地方寇亂
避居龍南城中飄然慨慕清修有遺世獨立之志

鍾朗鳴龍南人後改入定南少讀書涉獵諸子百家時賊
黃秀琦叛龍南令姜圻廉其才能薦馬軍門贊畫朗鳴
曰吾求潔身去亂足矣安敢慕顯榮哉不就舉賓飲亦
不就有避寇城中者出粟賑濟之

孫榮安遠廩生學裕經濟恬淡無營及貢不就惟怡情山
水雅志絃誦

鄧宗堯字大章信豐人端重純篤百家罔不研究尤邃於

贛州府志

卷三十四 隱逸

六

易築長岡□屋不求聞達終其身

李五行號藍□信豐人幼英敏棄舉子業以隱遯自高今
水北坊龍洲壩有竹林釣臺遺址

許騰蛟字龍友贛縣人明季諸生以詩文名丙戌城破全
家殲焉騰蛟逸入寶華寺爲僧縱游楚蜀二十餘年有
爲其侍僧者於南嶽見之尚無恙後不知所終

以張上志俱

國朝

鍾谷蘭字芳伯興國人精通子史絕意功名少遊燕洛多
題咏性孤介與林惕子林立人讀書花橋巖長寧吳松
若素稱博洽見之稱爲畏友郡守徵之不赴著有寒塘

集

謝不敏字其萃興國人工文詞淡於名利徜徉山水多留
題喜購古人法帖書甚工自號荷塘老人以上興國志

李陶字月培安遠人怡情書史不慕榮利喜遊歷山水有
觸輒發爲詩歌尤善丹青花木鳥獸窮態盡妍邑令以

高士禮之安遠志

呂岳瑚興國人自號還真太常復裔孫性恬靜無意聞達
敦尚孝友以身體力行爲務至老杜門謝客嘗有詩云
萬里雲霄意百年畎畝身那知漢陰丈亦是武陵人興國志

論曰隱者晦也逸者遺也懷才抱德不爲世用甘心
養晦遠逝自疏托身泉石之間蹇然一室嘯歌古人
以樂其志故隱逸之名惟賢者得有之因其名甚高

贛州府志

卷三十四 隱逸

七

每爲在下位者所欲托又無實以致之由是作僞而
日拙者不免焉持之不慎而虛以相加則賢者反爲
之混贛屬邑志乘所載亦濫矣今錄其真而削其僞
凡以明隱逸者之自有真焉云爾

戎畧

挾氣喜爭嶺北舊俗固然其地又用武之區生其間
者多以義勇著韜鈴風角智謀之士出焉然晉以後
傳者指不多屈至五代宋元而寢有聞終明之世寇
盜相尋

國初金王及三藩擾攘郡之屬邑各奮其力保障捍禦
或出身行伍効命疆場抒忠盡以蕭戎政若而人功

績不可沒也立戎畧傳

五代十國 楚代十 廖爽

後五代 歐陽晃 南唐白昌裕

宋 周虎臣 陳瑀 陳皓

元 吕志態 江秀敏 劉德

明 廖傑 李如爵 雷濟蕭庚附 姚璽 孟昇

孫洪舜 劉載永 盧述 杜喬拱 劉清澗

黎繼祖 謝錠 孫蘭 賴思明 甘宜鷗

歐陽永光

國朝蕭啟文 黄一爵 陳學禮 劉聲遠 藍子明

黄天棟 廖鐸 吳孔興 鍾藹吉 吕應選

贛州府志 卷三十四 戎畧 八

曹世瓊 曹成章 許盛 曹建龍 邱蒸

范洵 曾乾 范勳 潘吉 鍾元銘

徐陳榮 黄興 鍾科元

五代十國楚

廖爽虔州虔化人初事鎮南軍留後盧延昌為將延昌表於梁授韶州刺史為廣南所攻舉族奔湖南部曲隨者數千人馬殷以爽豪而多衆將拒不納或諫曰廖者料也馬得料必肥是國家强霸之兆乃遇以恩禮命為永州刺史爽具陳南越可取殷聽之往擊拔桂營十八城

十三國楚
春新
秋錄

後五代

□陽堯安遠人五季時嘗率義兵保障鄉井寇不敢犯郡上其功授檢校工部尚書妹九姑亦善武藝誓不適人呼爲太保嘗屯兵嶺上與兄爲犄角之勢因名其嶺爲太保嶺

南唐

白昌裕虔州書生南唐元宗遣嚴思討張遇賢於白雲洞監軍邊鎬以昌裕沈密有謀引與定計刊木開道以襲之賊衆遂潰其裨將李台執遇賢降

採十國春秋

宋

周虎臣虔州人與陳敏齊名政和初薛弼守虔知其才善待之後福州大盜有管天下伍黑龍滿山紅之號衆甚

贛州府志

卷三十四 戎畧

九

盛弼以集英殿修撰往知其州乃奏虎臣爲副將敏爲巡檢選兵壯千人號竒兵日給糧糗責以滅賊四年而

賊平

宋史

陳瑀雩都人多智勇劇寇彭友擁衆作亂虔江騷動岳飛奉命來征至贛瑀單騎走虔嶺詣軍門求見指陳賊勢虛實掀髯縱談皆中機宜飛壯之用其言遂斬彭友於雩都餘黨退保固石瑀復指畫山谷形勢飛命提戈前導深入賊壘盡降其衆卒鄉人廟祀之景炎間文天祥

駐軍雩都爲記其事於石

雩都志

陳皓字彥章虔州石城人勇力絕倫時郡邑多草竊監司郡守聞其名署攝邑尉遇警所向輒克建炎末巨寇李

敦仁嘯聚數萬連破贛諸邑復鈔廬陵臨川建昌長汀邵武諸處皓密往長汀募得壯士數百人還集鄉丁數千約會下河巡檢劉僅令子敏伏兵百鄙皓鼓衆先登與賊戰前後夾擊斬李世昌生擒李世立遂復石城進取寧都擒敦仁等諸邑皆復帥守列功狀特授承信郎石城縣尉秩滿移興國又平梅先胡寶鍾高羅洞天等賊後歸田里以子敏貴贈武議大夫

元

呂志熊興國人元至元間左丞管如德討鍾明亮於寧都志熊募壯士爲前鋒次吳口渡進屯官朝凡十餘戰斬級甚多授行院都事月的迭失趨贛奏爲贛州路總管

贛州府志

卷三十四 戎畧

十

府判官屯田龍南又從左丞董士選討贛益劉六十有功累擢總管兼管奧魯內勸農事大德丁酉至己亥旱澇頻仍繼以疫癘志熊賑卹拊循境賴以安致仕卒

吳草

廬墓志集

江秀敏興國人元至正中縣舉爲萬石長大嶺山賊曾石賴觀溫九等挾邪術倡亂行省叅政普庵撒里檄秀敏募鄉里壯士禦之秀敏率家丁九百人一夜馳往出賊不意擒三首孽斬級二十一生獲四十餘人餘衆悉竄

積功陞武德將軍

水志

□□字崇賢贛縣人戶部侍郎震霆子魁岸竒偉有文武
□元世祖至元間以明經授贛州路總管府經歷二十

五年有崖石寨劇賊進據本邑九峯山出沒爲害德習知地形險要繪圖指陳進兵方畧躬領健卒深入搗其巢穴執其渠魁衆皆就降餘寇以次悉平授平寇上將軍元祐間歿賜祭葬

明

廖傑字世貴龍南監生成化元年流賊攻縣率子弟衝敵先鋒繼以民兵追捕斬獲百餘人並收被擄子女事聞詔於本職上加三級未及注選而卒弟世英世能亦以同功授巡檢

李如爵宋評事子高裔孫成化間閩寇起殘破湖嶺間命州縣皆設機兵備寇如爵爲機總歲丁未賊鍾世賢王

贛州府志

卷三十四 戎畧

十一

九龍攻信豐會昌知府李璉調興國機兵往禦一戰馘其渠受金帛之賞寇退乃歸繪從征圖記其事

張志

雷濟蕭庾皆贛縣人都御史王守仁撫虔以二人才置幕下守仁平橫水桶岡三泖諸賊二人計畫居多宸濠叛守仁過豐城聞變謀疾趨還贛州發兵討賊南風正急舟不能動未幾風轉守仁呼一小漁船與濟庾同載因指取黃蓋示信行至新淦城下戒嚴不得泊出黃蓋示之乃開門迎入二人曰今歸贛稍遠宸濠徑襲留都兩京無備不能相救不若就吉安討之便適吉守伍文定來迎遂定策多爲計慮以撓其進止離其心腹與戰遂擒濠事平大駕諸軍南來無以爲功構陷奠元亨龍光

與濟庾等欲置之死元亨被執二人竄匿未幾庾病死
守仁親爲文祭之濟後選四川龍州宣撫司經歷志舊
姚璽世爲贛州衛指揮使正德間從贛撫王守仁征三泖
率民兵梅南春等從龍川爲龍鎮入與諸軍合力屢有
戰功盡平之嘉靖五年贛撫潘希曾出兵討泖頭賊失
利乃命璽與同知伍佐等統兵繼之戰於龍南太平堡
中泖等處擒其賊首餘黨逃竄奪回被擄官民
孟昇贛縣人祖孟德原籍山東鄒平縣充濟南衛累攻討
有功陞武德將軍調江西都司贛州衛千戶所世襲正
千戶所籍贛正德十二年四世孫昇隨都御史王守仁
征桶岡賊藍天鳳謝志山等生擒賊藍老葉子及朱廖

贛州府志

卷三十四 戎畧

十二

富十四年隨征宸濠又生擒賊朱鑾白欽憲陳才功陞
指揮僉事嘉靖三十六年流賊犯贛昇子息射殺旗頭
賊首並賊從多人乘勝追擊被圍陣歿以子應登襲職
孫洪舜字正南安遠人正德間隨王守仁征逆藩宸濠力
戰奏捷授御前指揮賜良將苗裔旌額併勅塋祖考於
羊醒岡

劉載永長寧人正德末廣寇葉廷芳盤踞黃鄉勞田丹竹
樓三保載永闔族被害時年十三奉母避難心懷報復
萬歷初白於贛守先設策以散其黨一鼓平之賜七品
散官附祀報功祠志張

盧述字思齋寧都人嘉靖間倭奴屢寇沿海諸郡述以策

千兵憲譚綸綸薦之督帥戚繼光使從征閩廣以軍功授贛州衛鎮撫累官至昌平遊擊在邊敵馬不敢南牧神宗以福將呼之遷內地歷寧紹總兵入爲前軍都督其用兵號令嚴蕭所過秋毫無犯好用計常言太平之將豈在多殺人治之於未亂耳以老歸寧夏闕播之變上猶思用述述亦自奮欲行而卒年八十一

寧都縣志

杜喬拱龍南人後隸定南嘉靖二十六年巢賊構亂喬拱倡衆擒獲賊總熊正科斬級二百餘招降賊黨邱子傳等二百三十餘人都御史吳百朋深嘉之給以百總萬歷元年廣賊官三口叛都御史李召至幕下決策遂平

之

定南志

贛州府志

卷三十四 戎畧

十三

劉清澗定南人嘗奉檄督率鄉兵防剿寇賊有功年七十部給壽民冠帶

黎繼祖定南人先奉檄征平遠賊梁能復征石子磧俱有功嘉靖四十五年叅戎蔡汝蘭征下歷繼祖亦畫策軍前

謝錠字雲章信豐人國學生嘉靖乙丑八月龍南賊賴清規出沒小江錠伏鄉勇於山谷蔡汝蘭與賊戰佯却伏兵起前後夾擊賊敗歸錠帥鄉勇以所奪賊幟先踞其巢又敗之清規遁走贛撫吳百朋嘉其功權授行軍通判辭不受

孫蘭字同軒贛縣武舉襲職爲千戶累陞贛右營都司時

廣寇侵掠蘭進剿之寇遁盡歸所掠男婦以功陞□□

温州叅將贛志訂縣

賴思明尹明遂嚴順民温時選劉壽儒駱賓始俱安遠人
萬歷三年葉楷之役思明等首發其奸旋從征剿既平
設長寧縣治贛撫江一麟褒其功並授百總

甘宜鵬信豐人崇正二年流寇鍾凌秀攻陷安遠宜鵬爲
千戶長團練鄉兵賊至防護卒保無虞縣上其事授贛
鎮中軍

歐陽永光字達清正文子也崇正間闖寇入縣境統率鄉
勇擊之寇遁以功授把總邑令李舉鄉飲

國朝

贛州府志

卷三十四 戎畧

十四

蕭啟文龍南人明末廣寇煽亂啟文倡義勇以備戰守順
治五年七月賊從洒源攻城啟文率鄉勇從水西小斜
嶺鼓噪挑戰城陷於賊啟文與劉一棟統衆攻之俱爲
賊擒至河西橋奮騰而起二人各挾賊墮水一棟與賊
俱溺死啟文於水中挾賊順流浮至青雲閣會昏黑賊
斃啟文登岸復集鄉兵轉戰四路斷塞賊無所掠勢窮

拔營遁去龍南志撰

黃一爵信豐人順治八年粵寇竊發邑令吉永迪奉南贛
撫劉武元檄徵一爵督軍一爵出奇制勝擒賊首二搗
巢三招撫一授軍門守備以諸將爭功辭不就

陳學禮長寧人貌偉有膽畧時余何等賊由桂陽取南安

文英營據險爲犄角勢張甚學禮作賣菜者入賊巢□
之歸謂主帥曰諸賊皆孺子易與耳請設伏賊營引兵
攻之可一鼓擒也從之夜半學禮奮勇入斬其巡邏者
發砲擊賊賊大驚遂走學禮卒兵追之誅其巨醜以功
授都司僉書

長寧志訂

劉聲遠字如綸安遠諸生國初山寇劫掠聲遠率鄉人築
寨守禦寇欲盡戮之忽雷雨大作寇迷失徑聲遠出諭
寇寇羅拜曰長者吾弗敢犯

安遠志

藍子明自郴連間避亂僑居興國甲寅韓大任據吉安興
邑村鄙鈔劫無寧宇子明奮先禦賊輒勝於是白石蜜
石竹管峒等處推子明爲長擊賊於廻龍嶂其子死焉

贛州府志

卷三十四 戎畧

十五

同伍以告子明不應戰愈力賊退縣令黃惟桂聞而善
之後寇警登城北望歎曰寶城鄉有藍山民在隱若一
敵國矣

激水志林

黃天棟長寧人體魁梧多力僞將朱明盤踞崖石寨天棟
夜率壯士緣崖劫其營斬巡邏者遂運薪草於賊寨縱
火楚之賊見火光燭天拔寨走天棟率兵躡之斬賊無
算賊窮納欵以功授廣東水師營副將晉總兵

長寧志訂

廖鐸字天木安遠諸生倜儻喜竒節康熙甲寅閩逆將陳
達先自會昌抵邑界勢甚張鐸與鍾元聲向邑令陸篋
陳方畧招集鄉勇六千人屯界內鐸甥鍾大德與賊戰
死鐸裂眦奮呼衝賊巢奪尸而還築柵堅守十日夜不

□甲賊乃遁邑得以全

志安遠

□孔興字雲從長寧諸生素嫻兵畧甲寅三藩之叛白巡撫色純延之幕府乙卯春隨澄海鎮將毛鳳翔招撫萬安諸寇孔興率數騎達賊營諭以順逆僞叅將鍾子龍等率衆五千降功未上而色純卒邑中有額外賦役孔興顛於制府于成龍勒石垂禁

長寧志

鍾藹吉字斯皇會昌人康熙甲寅土人乘廣寇之亂肆行劫掠藹吉設策保禦一境得寧丙辰耿逆將誘藹吉不從以兵威脅之藹吉乃遁山中癸巳雩都佃戶作亂奸民誘之劫其家並燬其廬報官戮其魁餘黨悉免

補撰

呂應選字羣英興國人甲寅崖賊蜂起應選捐財募兵保

贛州府志

卷三十四

戎畧

十六

城有功授贛州前營把總會吉安寇變從征屢捷以總鎮哲爾肯薦陞柳州都司抵任一載歸

興國志訂

曹世瓊長寧人僞將嚴自明據南安造子母鎗一發數聲軍患之世瓊令以絮裹身先士卒十人攫其鋒賊發砲無害砲盡賊窘世瓊大呼率兵斫營而入斬數千級焚十餘巢功最因失大將意授杭州副將陞浙東總兵未至卒

長寧志訂

曹成章長寧人三藩之變吉安南贛並爲寇據白鵝楓山庫鎮等役皆成章先登陷陣敗韓大任於吉安追至黃塘巖賊倚山恃固成章夜率銳卒二十人泅至賊背殺入賊方寢即取賊砲擊之賊潰又用賊所刊木從山上

滾壓之乘勝追奔及旦手血粘刀不能脫議功陞廣東提督中軍

長寧志
改撰

許盛原籍福建同安人從總兵許貞充土叅將投城安置贛州屯墾三藩叛閩將賈振魯圍石城巡道王紫綬薦盛禦賊復二縣斬僞都督征石峪戮僞遊擊擒僞總兵補贛鎮右營遊擊平會昌瑞金諸賊僞將嚴自明犯南康立柵堅守盛穴地出搗其柵焚之改中軍遊擊征上猶賊斬僞總兵殺二千餘人收復被擄人民以功署都督僉事從將軍蟒降嚴自明提督趙討韓大任盛攻弔峯老虎諸山俱斬將殺賊木鎮破上猶賊攻溪山盛屢捷遂犁其巢進右都督轉左都督復出兵攻崖石賊降

贛州府志

卷三十四 戎畧

十七

逆首朱明收萬餘人授拖沙喇哈番二十二年移鎮襄陽入武昌城諭賊夏逢龍不從身中四箭爲所縛盛逸歸移鎮宣府尋被勘罷

贛縣志訂

曹建龍字麗天贛縣人三藩之亂拔身行閒隨征會昌賊授把總征龍泉定南龍南諸賊斬其僞官從援信豐斬僞將張茂復調南康進千總隨遊擊李恢招撫楊夢月等而自擊退南雄賊又剿平寧都議功陞守脩改都司僉書隨將軍尚剿興國賊進福建興化遊擊未幾調守銅山加都督僉事征臺灣委建龍運糧累遷杭州水師副將在任聲明紀律調和滿漢兵以憂歸服闋補袁州革歷年侵糧之弊終南昌鎮總兵

參贛縣志

邱蒸字聖與雩都諸生少孤力學有胆識工騎射三藩之變流寇擾虔南蒸募鄉勇保護謁總鎮哲爾肯陳機宜竒之劄委副將許盛平南安復潭舖乘機剿雩之固院閩逆自汀陷會昌蒸招降僞總兵楊夢月等二邑遂復又敗韓城諸逆於寧都興國賊朱明負險最久蒸獻策主帥出竒兵絕其餉道並火其寨賊懼率衆降以功授守備辭歸養母遂不出

參雩都志

范洵字宜一長寧人康熙甲寅二藩叛逆寇盜蠡起洵散財倡衆身當賊鋒大小十餘戰寇不敢逼縣令余龍翔上其功授守備

曾乾號蒙泉龍南人嘗率子弟禦寇身冒矢石負重傷與

贛州府志

卷三十四

戎畧

十八

賊戰斬其將賊遁邑賴以安祀鄉賢

龍南志訂

范勲長寧人奸民曹子布作亂勲同鄉民余國祥等攻賊

誅其渠魁

舊志

潘吉袁三鵬鍾捷皆長寧人康熙十一年粵寇周海元潛入寒地山吉夜襲賊巢賊遁至牛山門三鵬等斬賊奪其旗旆並歸所擄婦女

補撰

鍾元銘字捷先安遠人甲寅寇蹂躪郡邑邑令陸箎募義勇剿寇元銘應募散貲糾集鄉勇屢戰獲捷寇平議敘

不就職年九十三卒

安遠志訂

徐陳榮贛縣人康熙十三年贛鎮哲爾肯聘爲參謀出方畧蕩平山賊授遊擊嘗設渡西津門置二舟捐租一百

□□十石膳舟子邑人聞風亦爭先捐膳

志參縣

黃興龍南人由行伍隨營征剿屢著勞績康熙十五年破賊王割耳十六年破瑞金老虎峒進剿湖南援永興授隨征百總十八年恢復衡山衡州祁陽攻克武岡州恢復鎮遠府二十年攻破鳴池河克重關太平橋走馬街恢復雲南省總督蔡上其功加七等授遊擊二十四年以原銜管都司僉書授湖廣撫中軍

鍾科元定南人由行伍於康熙己未挾策隨提軍哲入廣西授提標把總改思恩協員辛酉秋鎮安府有梟徒沈紹基韋之煌等負嵎肆殺科元冒矢石直抵賊巢擒獲渠魁陞上思營千總上思州界連十萬山乙丑冬賊衆

贛州府志

卷三十四 戎畧

十九

蹂躪邊民逃亡過半奉檄剿撲有功復以積俸陞福建

守備

志參縣

論曰郡之以武勲著者皆宦於郡者也漢晉以來嶺北用武尤多又散見於武事志中可謂細大不捐矣而猶有未盡焉有人爲贛產而宦於本郡有宦於他邦而人實贛產有激於義勇捍衛桑梓而參贊機宜於主帥者總之不離乎戎畧者近是按其時考其事若歐陽晃白昌裕之於五代南唐周虎臣陳瑀之於宋呂志熊江秀敏劉德之於元功績爛然史志昭垂落落然一鱗片甲之足稱者也明時郡邑界閩粵湖之交劇盜渠魁盤踞谿洞各邑團練鄉勇自爲保障

或起家武科或奮跡諸生獻策軍門式遏亂畧大府表其功績鄉邦資其藩衛至今尸而祝之傳文具在可攷而知我

國家承平百餘年不見兵革九邑之人服疇食德耕田鑿井極於雞犬皆寧回憶金王遘難吳耿作逆所以上煩廟算下資羣力者皆彰彰在人耳目鍾藹吉曹世瓊曹成章等擊敗僞將出奇制勝許盛本降兵安插屯守之夫膺薦克自振拔豈非奇男子事哉聞鼓鼙之聲則思將帥之臣今所傳五六十人庶不愧將帥之臣矣夫

寓賢

贛州府志

卷三十四

寓賢

二十

郡當閩粵之衝山川城郭樓臺諸勝蹟名賢遊宦遷徙往來於南土者多羈寓焉久暫不一轍而韻事流風人艷稱之唐宋明以來可謂麟遊而鳳集矣名賢之所止其地之人必曰某邱某土固某某所常盤桓也或詩文憑弔必又曰是某時某所爲某作也地以人重人以地傳詎不然歟立寓賢傳

唐 張說 李嶠 宋 璟 張九齡

宋 程顥 包拯 蘇洵 蘇軾 孔延之

楊方 趙希泊

元 滕賓

明 劉崧 陳謨 鮮縉 劉鴻 鍾灌

羅洪先 歐陽德 邱 濬 羅汝芳 張 鰲
郭子章 李邦華 王宗徐 劉牧鞭 楊學愿
郭 林 符遯中 萬發祥

唐

張說字道濟洛陽人長安中爲鳳閣舍人張易之陷魏元
忠引說爲驗說廷對忤武后謫欽州過虔寓紫極宮

志

贛

李嶠字巨山贊皇人同中書門下三品中宗崩嶠嘗密請
相王諸子不宜留京師及元宗嗣位獲其表張說言嶠
誠懵逆順然爲當時謀吠非其主不可追罪天子亦顧
數更赦遂免聽隨子虔州刺史暢之官

唐書

贛州府志

卷三十四 寓賢

二一

宋璟字廣平南和人開元初爲京兆尹徙廣州都督召拜
刑部尚書過虔州寓居豐樂寺

張志

張九齡字子壽曲江人弟九臯爲贛令嘗至贛凡治贛善
政多其經畫

舊志

宋

程顥程頤河南人以父大中失珣知興國縣事皆隨任
後珣攝南安倅識周敦頤於司理叅軍命二子師事之
每令尋孔顏樂處顥嘗言自再見周茂叔吟風弄月以
歸有吾與點也之意

按潞水志林云明道生於明道元年伊川生於二年
侍大中在興國時明道年十三伊川年十二所謂濂

洛淵源於是乎始也

包拯字希仁合肥人至虔師事陳晦之於崆峒山宋史

蘇洵字明允眉山人嘗南遊至虔與贛人鍾棐友善洵不喜飲酒棐每爲之設醴其後洵子軾轍過虔必造訪棐與棐子志仁志行志遠敦通家之好張志

蘇軾字子瞻紹聖元年秋以端明學士落職謫寧遠軍節度副使惠州安置過虔留月餘與州人陽孝本孫志舉遊又與霍守漢英及李侔賡和鬱孤臺詩元符三年復朝奉郎提舉成都玉局觀次年過虔留四十餘日寓居水南州人王原維楊呂倚皆與交宋時建祠於光孝寺

前今廢謝志

贛州府志

卷三十四 寓賢

二二

孔延之新喻人家貧好學夜燃松照讀日則帶經以鋤服

膺周子之學因以女妻郡人曾準至虔同準就周子講

學贛縣志

楊方字子直長汀人隆興初登第慕朱子之學及調弋陽尉還道崇安謁朱子受所傳而歸趙汝愚帥蜀徵之尋薦於朝召對擢宗正寺簿時僞學禁興坐汝愚黨罷居贛州閉門讀書自號淡軒嘉定初起復累官直寶謨閣廣西提刑卒於象州宋時建祠與蘇軾並祀今廢謝志

趙希泊宜春人宋宗室歷官戶部尚書咸淳中忤賈似道出爲廣東轉運使德祐元年制置使黃萬石檄其勤王得潰卒數百道經廬陵郡守邀其軍遂與從子必向避

地贛州亂定歸里時袁守聶嵩孫希泊內媼也勉之納
歎不屈文天祥兵敗於眞州與必向俱被執氣節愈勵
家人饋食則碎噐覆地不食死宋史

元

滕賓字玉霄睢陽人仁宗英宗間官翰林嘗客遊興國爲

監邑忽都必撰拯粥碑題令公巖十景詩激水志

按陳謨居南記云玉霄翁田翰林提文印出江西風
流篤厚其筆墨寶愛至今不替贛平川亦其遊衍嘯
歌處故老往往能道翁狂嬉狎洒韻致云

明

劉崧字子高泰和人原名楚元至正鄉舉明洪武三年第

贛州府志

卷三十四 寓賢

二三

進士任職方郎中北平按察使歷官吏部尚書致仕復
徵爲國子司業卒著槎翁集初崧未弱冠嘗與興國令
陳文彬善數往遊焉文彬多善政脩舉廢墜立學校繕
城垣以及梵刹道院皆崧爲之記元末江嶺兵亂避地
興國寇至則又徙之他處張志

張尚瑗曰崧詩有聞贛被圍東固大坑合兵攻興國
懷伯氏子中阻亂不得歸又懷一兄四舍弟俱客興
國所作其餘唱酬題咏之作尤多崧於興國寓蹟最
久而舊志失載故表而出之

陳謨字一德號心吾泰和人弱冠以詩文名虞文靖公集
見而稱之曰廬陵後來之歐陽子也洪武初召見宋學

士濂王侍制禕請以近侍官之辭疾而歸連應有司聘
爲廣東江西文衡海內言詩文者皆師宗之楊文貞公
士竒其自出也幼受學推重尤至著有海桑集自元至
正甲辰避亂興國去之永豐乙巳攜家復至後應詔赴
闕弟姪仍有留居者

張尚瑗曰謨所與遊若呂仲善仲實廖以善羅斗明
劉啟東李梅所謝維高周景元邱子萬蕭極初姚可
發見之於詩文贈答吳師魯孫觀民王伯貞則同客
之友也縣令賈思復朱克敬馮某二令沈司平廻龍
砦巡檢周伯景驛丞祝某則守土於興禮之者也黃
仲宏以奉使至者也曰仲氏以靜曰姪孫士瞻宗族

同旅寓於興異地遲歸見之於記憶者也先是二十
餘年劉槎翁嘗客授鍾廷芳家至辛丑壬寅亦以避
亂依陳令文彬以居其詩文所稱文士則鍾希浩鍾
廷亨廖月山邨民則陳宗舜儒將則黃進賢方外則
蒲衣道者楊質練師無邊僧以及椽吏之鍾大觀葬
師之胡從正醫士之馬如春閱海桑槎翁雨集而明
初之衣冠里巷文采風流亦班班矣獨鍾廷芳爲槎
翁客授主人既歿而海桑誌其墓呂仲善亦互見兩
公集中兩公旅蹟前後不相及未嘗形諸唱酬留歷
下亭飯潁山之佳話然同爲西昌詩人同被興朝辟
命槎翁自此平寓海桑書有才名踰五十年雄聲俊

彩錡炳風雲之語盖交相推伏者至矣

鮮縉字大紳吉水人永樂中嘗寓贛凡寺觀俱有題詠贛志

劉鴻字雲表泰和人弱冠鄉舉才名達於禁中憲宗賜以

巾曰遮暘免其家徭役邱文莊濬倪文毅岳戴恭簡珊

皆與為忘分交所居七星垵自號七星居士詩文集十

二卷嗜酒好遊嘗旅寓興邑人爭求銘誄贊序以為重

邑令曾選尤禮敬焉羅欽順七星集序
劉貞七星小傳

鍾瓘字良玉號西坡永豐人成化進士瓘素負氣節宰咸

寧以直道忤時致政歸其先自興國徙永豐數遊信興

二邑人士多從之遊嘗至越國公紹京祠以歲時不得

祀奉為憾命子移居遂為興國人激江志

贛州府志 卷三十四 寓賢 二五

羅洪先字達夫吉水人少讀王守仁傳習錄好之師同邑

李中傳其學嘗遊雩都需嚴羅田巖信豐香山皆有記

寓虔講學鳳凰臺後人建祠其上贛志

歐陽德字崇一泰和人舉鄉試至贛從王守仁學嘉靖二

年策問陰詆守仁德與魏良弼等直發師訓竟登第列鄉

傳

邱濬字仲深瓊山人屢住鬱孤臺歷遊勝境題咏甚多天

啟問贛令邱爾懿即其冢孫贛志

口汝芳字近谿南城人嘉靖間嘗遊雩都羅田巖有題詠

鰲南昌人嘉靖間嘗訪學於雩都黃宏綱何廷仁因謁

羅田巖濂溪祠

子章字相登泰和人隆慶進士累官大司馬未遇時授徒會昌三載與邑人謝國命蕭鈺友善遊漢仙巖題跡

猶存

吉安府志
張志

李邦華字孟闇吉水人幼喪母隨父傳經長寧鍾天斗家天斗母保怙備至後天斗卒其母猶在邦華貴顯從京師作贊寄之時有謝遵舜者授程鄉令與邦華同學鍾氏相友善

參遠志
安志

王宗徐號鶩泉泰和人舉人官至北直巡按御史嘗講學龍南邑士多從之遊

龍南縣志

劉牧鞭楚黃人與信豐郭脩野善脩野自滇致仕南歸築舍龍州山與泰和羅仲英永豐程九屏爲詩文友牧鞭

贛州府志

卷三十四 寓賢

二六

亦深契合遂築舍於脩野墅居焉性疎放好與山童野叟狎嘗戴國巾謁客脩野數誚之終不易及談論時事則不答或爲他語應之有來問字者誦說文正字通以示

楊學愿字內美泰和人進士官御史崇正十七年來寓龍

南閱二載

龍南縣志

郭林字入回泰和人孤介絕俗有潔癖終身不娶士論謂合元紫芝倪雲林爲一人居贛七鯉鎮製葛帷讀書其中識舊事編纂甚多丁卯霪雨爲灾室爲水淹卷帙漂蕩殆盡林拊膺而呼曰天祝予同時有安福吳雲者以詩名施閨章持節湖西重二人名葺白鷺書院延林王

席雲亦久客贛邑士學詩者多從之

張志

符遯中失其里居廣東提學道也以過贛道梗寓贛城破與其兄述中死之

萬發祥名養正新喻人崇正進士改庶吉士甲申闖賊陷京師發祥絕粒飲藥不死賊執而脅之降榜掠無完膚不爲動會賊敗去間關南旋寓居吉贛在贛叅楊萬軍事城破殉節又新喻諸生蕭瑛廬陵諸生段之渾亦寓

贛同殉

參通志

論曰郡中之山以人傳者若贛之玉巖雩都柴侯山興國令公巖泰娥嶺爲尤著然陽鍾本郡產秦娥又女仙也惟柴侯近流寓而隱者要其事涉荒幻不足

贛州府志

卷三十四 寓賢

二七

比於寓賢唐之二張公偉己李巨山嶠則就其子宋二程子則隨其父蘇氏眉山則三父子先後戾至皆無職守於虔而客遊及之謂之寓賢不亦宜乎至維揚呂夢得倚官瑞金主簿老而居贛元永豐劉楚竒鶚以行省叅政被執不屈囚贛慈雲寺明楊士竒掌琴江教事以失印居通天巖皆職官非寓賢也今特改歸其類而後寓賢爲得其實云

方伎

唐季自楊筠松僕都監挾青烏家術避地來虔精其所學至通神明於是曾文迪劉江東等傳筠松之教廖三傳及其子瑀傳僕都監之教故虔州知地理者

蠡起焉曾廖二姓子孫尤盛淵源所自不可誣也小
技之工尚若是况君子窮極洪範九疇之理數其所
舉豈不大哉立方伎傳

唐 楊筠松 僕都監 曾文迪

宋 劉江東 廖 瑀 謝世南 譚元謨 謝昔臣

黃景文 黎端吉

元 胡從正 馬春谷

明 邱宏道 蕭九賢 張應道 王通元 曾繼先

卜則巍 劉 漳 姚文選 袁 時 王 純

陳 珊 陳其才 吳 悅 廖 均 廖文政

廖紹定 曾應良

贛州府志 卷三十四 方伎

二八

國朝廖安民 劉家英 尹嘉實 俞 嶠 郭孔明

王 野 曾應坤 楊以叟 羅 牧 藥嘉善

唐

楊筠松竇州人唐僖宗朝官至金紫光祿大夫掌靈臺地
理事黃巢破京城乃斷髮入崑崙山步龍過虔州以地
理術授曾文迪劉江東諸徒世稱救貧仙人卒於虔葬

雩都藥口壩

舊府志

僕都監逸其名官司天監都監黃巢之亂僕與楊筠松避
地虔化遂以青烏術傳中壩廖三傳三傳傳其子瑀瑀
傳其壻謝世南世南傳其子永錫

舊府志

曾文迪寧都人師事楊筠松熟究天文識緯黃庭內景之

書尤精地理五代楊吳時遊至袁州萬載愛其縣西北山之勝謂其徒曰吾死葬於此卒如其言後其徒過豫章見之甚駭歸啟其冢則空棺也人以爲尸解云所著有八分歌二卷行於世

舊府志

宋

劉江東名白頭雩都人受青烏術於楊筠松初筠松不著文字江東稍有口訣傳於世後裔孫謙爲宋吏部郎中知袁州事乃著囊金七篇曰星龍穴法應案四獸水城明堂水口人傳爲宗旨

舊府志

廖瑀字伯禹寧都人年十五通五經人稱廖五經建炎中以茂異薦不第後精父三傳之術卜居金精山自稱金

贛州府志

卷三十四 方伎

二九

精山人所著有懷玉經後瑀文迪子孫皆徙居興國三寮至今繁盛盖兩家塚宅皆筠松所卜而貽之讖云

謝世南興國人得青烏術於廖瑀世南瑀之壻也後傳其子永錫爲武功大夫惠州巡檢使

張志

譚元謨全播子江東壻也精堪輿術著有司馬頭陀天元一炁論詞理精微深得江東肯綮裔孫仲簡得其傳

謝昔臣虔州術士蘇軾過虔贈以詩有憑君爲算行年看便數生時到死時之句

東坡集

黃景文字煥甫世傳青烏術文天祥嘗與共觀阡隴遇奇特者不取平夷者則稱之天祥叩之謂崇岡復嶺傷於急平原曠野病於散法當觀其變化審其融結意取其

靜勢取其和天祥稱爲名言

文山集

黎端吉客文天祥家入山一瞬而還問其山川巨細情狀

變態信手圖出其祖以堪輿著名端吉能世其術

文山集

元

胡從正興國人精青烏術主楊曾之說卜葬詳審無依違

欺蔽之病

劉槎翁集

馬春谷字春和興國人精醫術迎候治疾者口常填門春

谷咸赴其急貧者不計直子朝顯朝貴皆世其業學業

操行爲時所重

劉槎翁集

明

邱宏道雩都人博學能文得郭璞葬經究心三十年遂精

贛州府志

卷三十四 方伎

三十

其術與人言必本忠孝劉祭酒崧稱其有高世絕人之

風作叙贈之

劉槎翁集

蕭九賢字慕白會昌人精內外科洪武中克里長解實竹

至南都時馬皇后病乳癰甚危太醫治罔效出榜招醫

九賢應召治之三日而愈授太醫院吏目馳驛歸里著

有外科啟鑰回生要義諸編

蕭氏譜族

張應道字處機精音律得其妙解初爲道士於脩真觀永

樂間入京謁真人邱處密語及元教大重之更號元子

選入大暉爲樂舞生宣德中遊金陵復歸大暉住持士

大夫多以詩贈之皇甫汙爲之序

皇甫汙集

王通元龍南人精先天教能召神附人言吉凶甚驗叅戎

蔡汝蘭勦三巢通元許其必勝果口捷贛撫吳百朋召問家事方詣壇行香門子忽飛身立匾額旋復降詳判之百明甚驚異因官之以贊畫軍務

龍南志

曾繼先字元隆信豐人精研道錄明憲宗時中官懷娠難產繼先書符進之胎遂降中朝士縉皆作詩贈之

張志

卜則巍字應天贛縣人精形家言著作甚富所傳雪心賦語約而該業地理者宗之

舊府志

劉漳贛縣人精傳真以吏滿考授樂昌高勝巡檢寫宣廟御容得幸改鴻臚寺序班入內供奉陞錦衣衛鎮撫副

千戶

贛縣志

姚文選字石夫信豐人性倜儻娛情山水善書畫遊覽幾

贛州府志

卷三十四 方伎

三一

半天下與陳子壯何吾騶交最善

袁時字仰夏雩都人明醫術雖瀕死能起召請不避寒暑又能呼風役鬼歲旱禱雨輒應邑東五里靈泉巖有巨潭怪物作祟溺死者無算時書符焚潭中旬日雷雨大作山頂石隕於潭其患遂息子淳進士官御史

舊府志

王純贛縣人工水墨畫所作人物樹石筆法蒼老意趣天然前人稱爲石林畫史

張志

陳珊字華廷龍南人以醫名疏方不過數味服輒愈問之則曰我非能起死回生醫有補瀉攻和法誤用則殺人鍾寧得竒疾卧房中外事皆能言之羣醫措手珊投以

涼劑頓愈

龍南縣志

□其才安遠諸生因父多病遂事醫足不入城市甲申□
歉其才脩丹丸賑濟宗族數十家邑令以遺逸名儒旌

之舊府志

吳悅字自怡信豐人善琴兼工篆刻邑人藏其片石如至

寶焉舊府志

廖均卿瑀之後居興國永樂七年仁孝皇后大葬禮部尚
書趙甡引均卿至昌平得縣東黃土山最吉車駕即日

臨視封爲天壽山授均卿爲欽天監靈臺博士舊府志

廖文政嘉靖間奉詔遷造獻陵授欽天監博士從孫勝槩
尤精形家業被召亦授欽天監博士

廖紹定善談地理著地理指迷其說甚精弟紹寵著陽宅

贛州府志 卷三十四 方伎

三二

脩要書興國志

曾應艮萬歷庚子奉取遷貴州遵義平越二府有功授官
職姪鶴鴻應天王都御史取脩本院給官服曾日茂奉
益府取脩墳塋給賜典儀曾繼烈奉益府取脩宅兆給
賜典膳曾漢曾舉仕曾助國曾宗亮皆文迪裔並授散
職 國朝曾永章曾國瑞並徵召授博士興國志

按曾廖二姓子孫並移居興國三寮世其祖業累出
名師以白衣徵召得授官秩先世之貽謀亦遠矣哉

國朝

廖安民字覺生興邑諸生世傳堪輿安民尤神解太守郎
永清修府廡召之相度曰甚吉然不日有遷移之事未

幾以兒子巡撫江西遂調汾州又爲郎氏先世營宅兆
經歷塞外至紅羅山過吳三桂祖塋極山川環抱之勝
安民私語同行曰此覷非其分白虎啣尸十年外當覆
族後悉如其言舊府志

劉家英字叔美雩都諸生去舉業精醫學療病不取其直
所居嘯嶺有數虎爲害家英作文告山神設檻捕之不
旬日獲三虎餘悉去雩都縣志

尹嘉實字公倫先世雩都人以醫名贛城尤精幼科能活
險逆諸症一兒左顴發一痘已收靨尚煩燥不食嘉實
曰此名賊痘痘未出也將復出急投敗毒散二劑逾日
乃發遍體無隙地所纂有難經辨微脉訣辨微痘科誠

贛州府志

卷三十四 方伎

三三

求尹氏按驗書舊府志

俞嶠字巨山信豐人善山水樹石宗李咸熙韋偃倪雲林
諸家四方求畫者麇至性疎散遊吳楚閩粵諸勝空山
野水之濱吟嘯自若弟臨亦工書終身不娶信豐志

郭孔明宗儀子安遠人畫花草翎毛極工致安遠志

王野字草臣善水墨松梅翎毛鷄鷹尤善贛縣志

曾應坤字仲求寧都諸生治岐黃術邑賴以全活者甚衆
不計資受報土寇猖獗俊疫大作按藥救治上三鄉多
逋賦署令楊用陞欲詳請征捕合邑震恐無敢言者應
坤獨懇諤挽回不半載厲消逋清邑人德之寧都志

□□叡字惟明瑞金諸生幼穎悟嗜學工爲詩恣情山水

善書畫精篆隸以風韻勝四方仰其名多交焉

羅牧字飯牛寧都人工書畫得魏石床之法而益精焉寓

居南昌巡撫宋犖作二牧口贈之得製芥茶法甚善年

八十余海內爭購其筆墨真蹟

寧都志

樂嘉善字以貞舊爲進賢人精堪輿術康熙乙酉來遊會

昌適有修學之舉集地師論形勝獨嘉善最合衆人心

已而其術大行因籍會昌

論曰方伎雖小道而史不絕書志亦因之獨贛郡以

楊救貧避地於茲傳青烏之術於曾廖遂專門名家

著書立說以自表見說者謂贛人惑於風水實自曾

廖開之然豈惟贛人哉古之賢者未嘗不兼焉相

贛州府志

卷三十四 方伎

三四

原觀泉以居爾東澗西瀍以卜洛載在詩書中原和
會之區皆地理之自然但不如葬師曲說爲福田利
益起見耳舊志載二家子姓代挾其術世襲官階今
亦不得而畧之也傳列若干人操術頗精其他醫卜
星相書畫之屬果能神而明之不有技進於道者歟

贛州府志卷三十四